

諸見集生。生已自害。大樹相似法故。如經。譬如大樹。眾鳥集之。則有枯折之患故。

次科諸見。謂邊邪我法。六十二見等。能傷正慧。故云自害。樹譬自心。鳥喻諸見。枯折譬自害。

△<sub>五三</sub> 喻沉溺。

復示無出離相。煩惱業生故。老象溺泥。相似法故。如經。世間縛著。沒於眾苦。譬如老象溺泥。不能自出。是名遠離故。

三中煩惱業生。釋經世間縛著。如老象也。業必招果。故云沒於眾苦。如溺泥也。

此一段經。全乖  
解疏記。

論意。不  
足標破。

△<sub>戊四</sub> 不疲倦功德三。標章。舉經。釋義。

今初

次說第四。大人不疲倦功德。

△<sub>己三</sub> 舉經。

經曰。汝等比丘。若勤精進。則事無難者。是故汝等當勤精進。譬如小水常流。則能穿石。若行者之心數數懈廢。譬如鑽火。未熱而息。雖欲得火。火難可得。是名精進。

△<sup>己三</sup>釋義二。<sup>庚一</sup>釋精進。<sup>庚二</sup>釋懈怠。初中三。<sup>辛一</sup>明益。<sup>辛二</sup>勸修。<sup>辛三</sup>喻顯。今初

論曰。是中不疲倦者。示現不同外道精進故。於一切法一切行善趣故。成就不退轉故。如經。汝等比丘。若勤精進。則事無難者故。

第四功德。釋精進中。初科不同外道者。邪行精進無所獲故。一切法即所學法門。一切行即所修對治。凡論為道。無出此二。精進能入。故云善趣。此即因也。成就不退。即約果也。經中事字。即是因果。善趣能成。謂無難也。

△<sup>辛二</sup>勸修。

以能成就不退。須修習長養故。如經。是故汝等當勤精進故。

次科躡上因果。發下勸進。須修習者。不虛棄故。釋經當字。長養者。不可廢故。釋經勤字。

△<sup>辛三</sup>喻顯。

復以譬喻。顯示不休息精進。成就有力故。如經。譬如小水常流。則能穿石故。

三中不休息。如水常流。有力如能穿石。

△<sup>庚二</sup>釋懈怠。

次說懈怠過。不能常精進。念處退失。不成就心慧故。依譬喻顯示應知。如經。若行者之心數數懈廢。如是等故。

次懈怠中。念處謂四念處。觀身不淨。觀受是苦。觀心無常。觀法無我。或可凡所受法。三學八正等。隨所修行。皆名念處。言退失者。釋經數數廢也。鑽木取火。一勢乃得。未熱而息。喻念處退。火難可得。喻不成心慧。

△<sup>戊五</sup>不忘念功德二。<sup>己二</sup>標章。<sup>己二</sup>舉經。<sup>己三</sup>釋義。

今初

次說第五。大人不忘念功德。

△<sup>己二</sup>舉經。

經曰。汝等比丘。求善知識。求善護助。無如不忘念。若有不忘念者。諸煩惱賊則不能入。是故汝等。常當攝念在心。若失念者。則失諸功德。若念力堅強。雖入五欲賊中。不為所害。譬如著鎧入陣。則無所畏。是名不忘念。

△<sup>己三</sup>釋義二。<sup>庚一</sup>總示。<sup>庚二</sup>列釋。

今初

論曰。第五。大人不忘念功德者。示現是一切行上首故。能破無始重怨故。